

**UMUMIY O’RTA TA’LIM MAKTABALARIDA SINFDAN TASHQARI TADBIRLAR
VOSITASIDA O’QUVCHILARDA MADANIY IMMUNITETNI RIVOJLANTIRISH
OMILLARI**

Tojiboyeva Xilolaxon Maxmutovna

O’zbekiston pedagogika fanlari ilmiy tadqiqot instituti (O’zPFITI) direktorining ilmiy ishlar va innovatsiyalar bo‘yicha o‘rnbosari, pedagogika fanlari doktori (DSc), katta ilmiy xodim hilol0311@mail.ru

<https://doi.org/10.5281/zenodo.7927169>

Annotatsiya. Ushbu maqolada sinfdan tashqari tadbirlar vositasida o’quvchilarda madaniy immunitetni shakllantirish usullari, pedagogik imkoniyatlari bayon qilingan bo‘lib, umumta’lim maktablari pedagoglari va ma’naviy-ma’rifiy ishlar bo‘yicha direktor o‘rnbosarlarining ta’lim-tarbiyaviy faoliyati shuningdek, shu maqsadda o’smir yoshdagi o’quvchilarda madaniy immunitetni shakllantirish borasidagi ishlarni tizimli tarzda tashkil etilishi haqida fikr yuritilgan.

Kalit so’zlar: sinfdan tashqari tadbirlar, sinf rahbari, direktor o‘rnbosari, ma’naviy-ma’rifiy ishlar, madaniy immunitet, xulq-atvor, axloqiy sifatlar, suhbat, sinf soatlari, o’quv konferensiyalari, milliy madaniyat, madaniy xulq-atvor stereotiplari.

Umumta’lim maktablari pedagoglari va ma’naviy-ma’rifiy ishlar bo‘yicha direktor o‘rnbosarlarining ta’lim-tarbiyaviy faoliyati shuningdek, o’smir yoshdagi o’quvchilarda madaniy immunitetni shakllantirish borasidagi ishlari tizimli tarzda tashkil etilishi maqsadga muvofiq. Ma’naviy-ma’rifiy ishlar bo‘yicha direktor o‘rnbosarlari va sinf rahbarlari o’smir yoshdagi o’quvchilarda madaniy immunitetni shakllantirishga yo‘naltirilgan ishlarning mazmunini ushbu maqsadga qaratgan holda amalga oshirishlari lozim.

Bunda tarixiy-madaniy boyliklarimizni o‘rgatishga qaratilgan badiiy kechalar, saxna ko‘rishlari, kitobxonlik kechalari, mushoiralar, baxs-munozaralar tashkil etishga alohida e’tibor qaratiladi[1].

Navro‘z bayrami va buyuk mutafakkirlarning tavallud sanalari bilan bog‘liq holda xam turli tadbirlar tashkil etilib, unda o’smir yoshdagi o’quvchilarga madaniy qadriyatlarni o‘rgatishga alohida e’tibor qaratiladi. Fan to‘garaklari tarixiy, madaniy qadriyatlarni o’quvchilar ongiga chuqur singdirishning asosiy vositasi hisoblanadi. Tarix, Adabiyot, Tarbiya, Ona tili, Musiqa, Tasviriy san’at kabi fan to‘garaklarida vatanimizning shonli tarixi, ulug‘ shoir va mutafakkirlar, muqaddas ona tilimiz va uning tarixiy taraqqiyoti, mumtoz musiqa, milliy xarakterdagи tasviriy san’atga oid tarixiy-madaniy qadriyatlarga oid bilimlar o’quvchilarga taqdim etiladi va ularning ilmiy-madaniy dunyoqarashi rivojlantiriladi[2].

Sinf rahbari va ma’naviy-ma’rifiy ishlar bo‘yicha direktor o‘rnbosarining sinfdan tashqari tadbirlar vositasida o’quvchilarda madaniy immunitetni shakllantirishga yo‘naltirilgan pedagogik faoliyati ushbu yo‘nalishdagi muayyan vazifalarni amalga oshirishga qaratiladi.

Sinfdan tashqari tadbirlarning mazmuni o’smir yoshdagi o’quvchilarni madaniy axloqiy jihatdan rivojlantirishga qaratilishi, ularda “ommaviy madaniyat”ga qarshi immunitetni shakllantirishga xizmat qilishi lozim. Sinfdan tashqari jarayonlarda tashkil etiladigan tadbirlar o’smir yoshdagi o’quvchilarning madaniy axloqiy yo‘nalishdagi bilimlarini chuqurlashtirishga, ularda gender rollarni tarkib toptirishga xizmat qilishi kerak.

Maktab psixologi o’smir yoshdagi o’quvchilar bilan samarali ishlashi, ularning ruxiy-emosional xususiyatlarini yaxshi bilishi, madaniy qadriyatlarni egallahsga bo‘lgan qiziqishlarini

aniqlash asosida moyilliklarini hisobga olishi, qiz va o‘g‘il bolalar orasidagi o‘zaro munosabatlarni tahlil qilishi, ular orasida mavjud bo‘lgan ziddiyatlarni aniqlab bartaraf etish chora-tadbirlarini ishlab chiqishi maqsadga muvofiq[3].

Sinf rahbarining muhim vazifalaridan biri o‘quvchilarini, ularning xarakter xususiyatlari, xulq-atvori, axloqiy sifatlarining mavjud darajasini chuqur tahlil qilib, bartaraf etiladigan salbiy jihatlarini aniqlash va tegishli chora-tadbirlarni rejalashtirishdan iborat. O‘smir yoshdagi o‘quvchilar turli fan o‘qituvchilari, tengdoshlari, ijtimoiy tashkilotlar va nihoyat oilaning doimiy ta’siri ostida bo‘ladilar. Shunga ko‘ra sind rahbarining muhim funksiyalaridan biri o‘quvchilarga ta’sir ko‘rsatayotgan ijobiy va salbiy omillarni aniqlashdan iborat.

O‘quvchilarning ijobiy sifatlarini uzlusiz rivojlantirish maqsadida ularni rag‘batlantirish va qo‘llab-quvvatlash gender rollarning to‘g‘ri shakllanishi va madaniy dunyoqarashlarining boyishini ta’minalashga xizmat qiladi. Sinf rahbari ijtimoiy tarmoqlarga bog‘lanib qolgan, “ommaviy madaniyat” ta’siriga berilgan o‘smirlar, ayniqsa, moda ketidan quvayotgan o‘smir yoshdagi qizlarning xatti-harakatlarini tahlil qilib, ularda madaniy immunitetni shakllantirish chora-tadbirlarni qo‘llashdan iborat. Bunda sind rahbarlari, ota-onalar bilan yaqin hamkorlik qilishlari maqsadga muvofiq. Agar oiladagi madaniy muhit salbiy xarakterga ega bo‘lsa, sind rahbarlari mahalla faollari bilan hamkorlikda o‘smirlarning ota-onalari bilan ham suhbatlar olib borishlari, ularning madaniy dunyoqarashini rivojlantirish yo‘llarini izlab topishlari lozim.

O‘quvchilarda sog‘lom madaniy dunyoqarash va immunitetni shakllantirishda sind rahbarlari quyidagi metodlardan foydalanishlari kutilgan samaradorlikka erishish imkonini beradi.

Ma’lumki, sind soatlari o‘quvchilar bilan tarbiyaviy tadbirlarni amalga oshirishning asosiy shaklidir. Sinf rahbarining tarbiyaviy ishlar rejasi asosida sind soatlarining mazmuni belgilab olinadi. Sinf soatlarida sind rahbari o‘quvchilar bilan aniq mavzularda muloqotni tashkil qiladi. Sinf soatlarida o‘quvchilar o‘z fikr-muloxazalarini erkin bayon qilishlari uchun qulay sharoit yaratiladi. Sinf soatlarini tashkil etishda pedagoglar o‘quvchilarning yosh xususiyatlari, bilim darajasi, dunyoqarashi, nuqtai nazarlarini aniq hisobga olishlari talab etiladi.

O‘smir yoshdagi o‘quvchilar bilan sind soatlarida bugungi kunning dolzarb masalalari, gender rollarning shakllanishi, shaxslararo munosabatlari, ijtimoiy tarmoqlardan olinadigan axborotlarni saralash, ijtimoiy tarmoqlardan foydalanish madaniyati, “ommaviy madaniyat”ning salbiy va ijobiy jihatlari, “ommaviy madaniyat”ning salbiy ta’sirlaridan saqlanish, o‘quvchilarni “ommaviy madaniyat”ning salbiy ta’sirlaridan ogohlantirish, o‘quvchilarda milliy madaniyatimizga xos xulq-atvor me’yorlari haqida tasavvur hosil qilish kabi dolzarb mavzularda suxbatlar tashkil etilishi lozim. Sinf soatlarida amalga oshiriladigan suhbatlar sindagi barcha o‘quvchilar yoki xulq-atvorida salbiy jihatlar kuzatilayotgan o‘quvchilar bilan individual tarzda o‘tkazilishi mumkin.

Ma’lumki, pedagogikada o‘quvchining noo‘rin xatti-harakatini sind jamoasi oldida muhokama qilish uni uyaltirish maqsadga muvofiq emas, deb hisoblanadi. Bu ayniqsa, o‘smir yoshdagi o‘quvchilarga salbiy ta’sir ko‘rsatadi[4].

Qiz bolalar oldida o‘g‘il bolalarni mulzam qilish o‘smirlar uchun kechirilmas holat hisoblanadi. O‘smir yoshdagi o‘quvchilarga ishonch bildirish, ular bilan do‘stona munosabat o‘rnatish, ular uchun qadrli bo‘lgan qadriyatlariga samimiy yondashish kutilgan samaradorlikka ejrishish imkonini beradi[5].

O‘quvchilarda madaniy dunyoqarashni tarkib toptirishda o‘quv konferensiyalari katta ahamiyatga ega. Bu o‘z navbatida o‘smir yoshdagi o‘quvchilarda estetik didni shakllantirish,

milliy madaniyatimizga hurmat bilan qarash, tarixiy madaniy qadriyatlarni avaylab asrash, shaxslararo munosabatlar me’yoriga amal qilish ko’nikmasini shakllantirishga xizmat qiladi. O‘quv konferensiylarini disput shaklida tashkil etish natijasida o‘quvchilardagi mavjud qarashlar qat’iylashadi. Haqqoniy madaniy dunyoqarash shakllanadi. Ziddiyatli vaziyatlarga echim topiladi. Yagona fikrni qo’llab-quvvatlash madaniyati shakllanadi.

O‘quvchilarda madaniy dunyoqarashni shakllantirishga yo’naltirilgan o‘quv konferensiylarida amalga oshiriladigan disputlar murakkab xarakterga ega bo‘lib, o‘smirlarda madaniy immunitetni shakllantirishga xizmat qiladi. Bunday o‘quv konferensiylariga o‘qituvchilar o‘quvchilarni jiddiy tarzda tayyorlaydilar. Ularni mustaqil izlanishga undash asosida yangi g‘oyalar, fikrlarni generasiyalashga o‘rgatadilar. Bunday generasiyalash natijasida disput vaziyati vujudga keladi.

O‘smir yoshdagagi o‘quvchilar mazkur tadbirda o‘z fikrlarini mustaqil bayon qilish bilan bir qatorda amalda o‘zlashtirishlari zarur bo‘lgan madaniy me’yorlarni egallahsga muvaffaq bo‘ladilar. O‘quvchilarda madaniy immunitetni shakllantirishda ularga qo‘yiladigan axloqiy talablar ham muhim ahamiyatga ega.

O‘quvchilarning madaniy dunyoqarashi sinf rahbari tomonidan taqdim etilgan yangi bilimlar, xulq-atvor qoidalari, madaniy xodisalar haqidagi qarashlar yordamida boyib boradi. Sinf rahbarlari hayotiy vaziyatlarni o‘quvchilarga anglatishda real voqelik bilan bog‘liq hodisalardan foydalanishlari lozim.

Xulq-atvorni tuzatish metodidan foydalanish o‘smir yoshdagagi o‘quvchilarda madaniy immunitet hamda gender rollarni shakllantirishda muhim ahamiyatga ega. Ushbu metod doirasida o‘smir yoshdagagi o‘quvchilarda shaxslararo munosabat madaniyatini tarkib toptirish, ularni atrofdagilar bilan tolerant munosabatda bo‘lishga o‘rgatish, millatimiz vakillari uchun ahamiyatli bo‘lgan qadriyatlardan foydalanish tajribasini hosil qilish imkonini beradi. Sinf rahbarlari ushbu metoddan foydalangan holda o‘smir yoshdagagi o‘g‘il va qiz bolalarning xattiharakatlari, ular amal qiladigan xulq-atvor me’yorlarini chuqur tahlil qilib, bo‘sliqlarni aniqlashlari, o‘smirlar yo‘l qo‘yadigan kamchiliklarni bartaraft etish chora-tadbirlarini ishlab chiqishlari lozim.

O‘smir yoshdagagi o‘quvchilar xulq-atvorida uchraydigan kamchiliklarni korreksiyalash ularda madaniy immunitetni shakllantirishning muhim shartidir. Bunday korreksiyalash tashxislash metodikasini qo’llash natijasida amalga oshadi.

Jamiyatda obro‘-e’tibor qazongan shaxslar xulq-atvorini namuna sifatida ko‘rsatish, ular amalga oshirgan ibratli ishlar haqida o‘smirlarni xabardor qilish, ular xulq-atvoridagi kamchiliklarni korreksiyalashning ta’sirchan metodi hisoblanadi. Zarur bilimlar va madaniy qadriyatlarga ega bo‘lgandagina o‘quvchilar atrofdagilarning xulq-atvorini munosib baholay oladilar va ularning yaxshi ishlaridan ibrat olib ruxlanadilar. Shu tariqa o‘smirlar ongida hayotiy ideal qiyofasi shakllanadi. Atrofdagilarning ibrat namunasi o‘smir yoshdagagi o‘quvchilarga ijobjiy ta’sir ko‘rsatadi. Ularda madaniy xulq-atvor stereotiplerini shakllanishiga ko‘maklashadi.

Atrofdagilarning ibrat namunasi o‘smirlarning ong ostiga ta’sir ko‘rsatib, ularning his tuyg‘ularini qo‘zg‘atadi. O‘smirlarning e’tiborini atrofdagi salbiy hodisalarga qaratish orqali ogohlantirish metodidan foydalaniadi. Bunda salbiy xulq-atvor stereotipleriga ega bo‘lgan kishilarning hayotidagi og‘ir vaziyatlar uning oqibatlari o‘quvchilar ko‘z o‘ngida tahlil qilinib, bunday xulq-atvor stereotiplerini bartaraft etish yo‘llari ko‘rsatiladi. Bunday misollar o‘smirlarni salbiy harakatlardan tiyilishga undash bilan bir qatorda bunday harakatlarning shaxs va jamiyat hayotiga ko‘rsatadigan negativ oqibatlari haqida xabardor bo‘lishlariga erishiladi.

O‘quvchilarda madaniy xulq-atvor stereotiplarining shakllanishida o‘qituvchilar, ota-onalar, sinfdoshlari, jamiyatdagi taniqli shaxslarning ibrat namunasi katta ahamiyatga ega. O‘smir qizlar uchun aksariyat hollarda o‘qituvchilari, onalar ideal hisoblanadi. O‘smir yoshdagi o‘g‘il bolalar esa ko‘proq otalaridan o‘rnak olib ularga ergashadilar. O‘qituvchining xulq-atvori va imidji o‘quvchilar uchun ibrat namunasi hisoblanadi. Ular har doim ijobjiy xulq-atvorga ega bo‘lgan nazokatli o‘qituvchilarga ergashadilar, ularga taqlid qiladilar.

Umumiy o’rtalim maktablarida o‘quvchilar pedagoglarning voqelikka munosabatini sinchkovlik bilan kuzatadilar, ularga turli savollar berib, nuqtai nazarlarini aniqlashga harakat qiladilar. Shu asosda o‘qituvchilarni baholaydilar. Ular o‘zlarining shaxsiy baholariga asoslangan holda o‘qituvchilarga nisbatan o‘ta ijobjiy, o‘rtacha va salbiy munosabatlarini bayon qiladilar.

O‘smir yoshdagi o‘quvchilarda madaniy immunitetni shakllantirish ularning amaliy faoliyatini tashkil etish bilan bevosita bog‘liq. O‘quvchilarda madaniy immunitetni shakllantirishga yo‘naltirilgan amaliy faoliyat mashqlar yordamida shakllantiriladi.

REFERENCES

1. Xodjayev B.X. Umumta’lim maktabi o‘quvchilarida tarixiy tafakkurni modernizasiyalashgan didaktik ta’minot vositasida rivojlantirish. Pedagogika fanlari doktori. ... diss. – T., 2016. – 314 b.
2. Qosimova N.D. O‘smirlar ijtimoiylashuvida ibrat ijtimoiy psixologik xususiyatlarining ahamiyati: Ped.f.n. ... dis.avtoref: - T.: TDPU, 2010. – 26 b.
3. Umarova M.M. O‘smirlarda oilaviy qadriyatlar to‘g‘risidagi tasavvurlar shakllanishining ijtimoiy-psixologik shart-sharoitlari. Psixol. fan. nom. dis. avtoreferati: 19.00.05. – T.: O‘zMU, 2004. –27-b.
4. Qurbonniyozova Z.M. Tarbiyaviy ishlар jarayonida o‘quvchilarda milliy o‘zlikni anglashni shakllantirishning pedagogik asoslari. Pedagogika fanlari nomzodi ilmiy darajasini olish uchun yozilgan dissertasiya. -T.: 2000 – 286 b.
5. Xalilova N.I. O‘smirlik davrida o‘zini-o‘zi nazorat qilish shaklanishining psixologik xususiyatlari: psixologiya fanl.nomzodi. diss. Toshkent. 2010.